

Wetshelu wa Akenda

OKENDE ASU NDU OTSHOKO ASU

« Ekiya ona lu mbuka k'ololo kahumbandi ntsho. Ku lam'ayunduyala ekumunyi, ndi hangana uma loko ». (Tukedi 23:6)

UKI WA OKENDE ASU

Okende wa mbetsha ana eko ntundu le ambutshi. Ku naka ambutshi haweyi Unyashungu a mete, haweyi Jesu Kristu On'andi lakandatumi la kete nye dia ndjutushimbela uma lu akolo asu, la ndjudihula mbuka ka shu antu nkuma l'ulungu lu luudu la Shi, akona ayetsha an'awo na? Khumadiondjo asutshasutsha etem'asu la aludia etem'asu too la ngandji kandi le akenda.

Wekelu wayeka ona uma ka nshi ya ashashi andi wayuyala la ndi pulu la usumbi andi. Tutukungaki edja ndu ona ambula yema. Tutateli mbêsha lam'endi kendakenda ya tshitshe.

UKI WA OTSHOKO ASU

Unyashungu Ndame ayutotshokola lu lumu lasu lam'esu lu mbetsha akenda akambu andi. Ukitanyia atuhuluyaka otshoko a Unyashungu: lumu lasu le Kristu layongona. Ndu ana vame wayutotshokola. Enda Tukedi 31:26 la 28.

OKENDE ASU LE ANA VO ONE:

1. Mbeta tokendakenda wayi LE JESU. « Jesu...akawatela ati, Nyete tokendakenda wayi LE MI, tanyasikeki ... » (Mako 10:14). Ana amotshi walanga ndja le Jesu...tanyasikeki. Amotshi akina wambushisho uku ana w'ekoko... nyuwayangi. Eko kawo mbaeta l'école de dimanche kana lu kalasa kina ya mbaetsha Bible, ku tuho shati, lulangu la Unyashungu eli dia shu mbaeta LE JESU.
2. Mbeya kumbu yawo, ona la ona. «Ndi atetaka ekoko andi kumbu» (Joani 10:3). Eya ndu ambutshi awo la len'adjasewo.
3. Mbalombela Unyashungu...ndjimula kumbu yawo, ona la ona le Shesu lu dombelo di'usheshe. (Enda 2 Timote 1:3).

4. Mbakendela lakawo tena dimotshi, djekaleka naka ona mbetshaka kalasa, ndu naka ona kana usi kandi eko la hemo kana eko la pa kemotshi.
5. Mbauka ngandji kaha la aui atu. (Enda 1 Koreto 13:11a2). Akambu aso atanu, «DIKAMBU DIULEKI WUKI L'ATEI AWO KU NGANDJI» 1 Koreto 13:13.

Yimba ya nkimanyia Embetsha wa kalasa y'akenda.

1. Otekete le wo l'oteketa l'aui walimbitelawo. Awele eli ma dia ona ashashi. Mbu ya nde ya wulu ndjalaka ne dia etshundju w'antu. (Enda Heberu 5:13 la 14). Lu Mako 5:41 shu menaka aui w'oteketa wahateyi: « Talita kumi »Vo weli aui wakateketa Khumadiondjo Jesu le ona Jayiro lam'akandawulula uma lu nyoi. Lam'akandateketa le ona ako, Ndi akateketa l'oteketa wetawo Aramaique. Oteketa ako aki oteketa wa khumbu, wakateketa ambutshi le an'awo. Khumadiondjo Jesu akateketa le ona l'oteketa wakandalimbetela wuleki ololo, uku ateketa shi la ona. Ndi ambutusha djimbitelu.
2. Uho wati, dimi leli lu mbeta ana wayi LE JESU. Alesona w'uma lu Daku di'Edjedja ndu wa lu Daku di'Uyuyu weli lu ntetsha dia Jesu Kristu. (Enda Luka 24:27). Uwaenya Jesu.
3. Etsha ana aui amotshi wa Bible wayuwakimanyia mbuho desona. Watake aui ako l'etatelu ka desona, ndu tena dimo l'atei a desona ndu l'ekumelu ka desona. (Enda Usambu 119:11).
4. Lu kalasa tshe, uwambuli embula wa alesona wakayetsha ntundu ndu dia vo vame mpimba mvuta aui wa mbuho wakaweki lu alesona akina.
5. Osonole esambu wukuki ana nshihudia aui awo. Esambu emotshi weko lu dibuku uku 162 « Jesu, Ndi la mi ngandji », 164 «Layunduya, layunduya », 167 «Ngandji, ngandji, ana tshe wa tshitshe, 168 «Lam'atumalaka dia Jesu Kristu», 31 «Lu luudu la ngombe», , la 229 «Esasi waheta l'udjima», (ndu usambu 15, «Jesu lukumbu laye lone, », lu dibuku dia tshitshe dieko kawo.) Tusambusambu ta aui wa avesana amo lu Bible teko ololo efula. Vo weli lu nkimanyia ana dia mumba aui wa Unyashungu l'etem'awo. Sonola aui amo ku embawo la wembelu anyu.

6. Naka ana weli lu mpasahasa lu kalasa, kuyanga we ambutate mbaetsha desona, emba la wo usambu omo, kana uwateketsha diui dia mbuho, kana uwambuli embula emo dia nkaluya tukanyi tawo la desona ntu.
7. Dombelo dia l'etatelu ndu dia l'ekumelu ka kalasa diayali l'au wayulimbitela ona. Tufudiaki aui. Ana wayulanga nkenya l'asukanyi awo lam'eli ashu aye khu!

ELONGOSWELO KA DESONA

1. Olombe Unyashungu dia Ndi nkusha tukanyi talangandi we mbetsha ana. Uyali ki la ntundu kandi dia mbuka diui diandi le ye. (Enda Joani 14:26).
2. Uyangi etinyi ka Bible kalangandi we mbetsha.
3. Utshi préparation lu kaye (cahier). Eshimu ene wayunyukimanyia:

Ushimu wa desona (sujet)

Walelu wa umbetsha lakandi

Walelu wa mbala lu kalasa. Naka ana weli tutshitshe, ala aui atoi atu.

Diui dia mbuho.

Kahanya wetshelu tinyi tinyi ndu ukaneli embula wa mbambula.

Kanela enyelo ka menya ana dia mbakimanyia mbuho aui wekawo.

Djimbite lu motshi:

Lu Luka tshapita 15 shu mbeyaka nkahanya wetshelu wa Jesu lu alesona anei :

1. Okoko wakashisho.
2. Etinyi ka fesa kakashisho.
3. Ona kushi lakashisho l'akolo andi.
4. Ona l'enundu lakashisho la utaku andi.

Layunyusha elongoswelo kemitshi ka desona dia ntundu uku djimbite lu ku nyu mbeyaka nkiyela lu ntsha préparation ka alesona akina.

Ushimu wa desona: OKOKO WAKASHISHO

Walelu wa umbetsha lakandi: Luka 15:3 pulu la 7, ndu Joani 10:1 pulu la 16, ndu vesa 26 pulu la 30.

Walelu wa lu kalasa: Luka 15:3 pulu la 7.

Diui dia mbuho: Luka 19:10, «On'a untu akayi, dia ndjuyanga la ndjushimbela wakashisho. »

Desona :

1. **Kondola okondo wa wela** l'auyi aye weme wuhu wayulimbitela ana. Uwambuli wati, okoko eli na? Ana angana lane wambena okoko? Lu nshi yaki Khumadiondjo Jesu la kete, ekoko waki ongonyi wa akangawo. Alami awo wakole okoko tshe lukumbu, la ekoko wakeyi diui dia ulami awo. Vo wakayeli ulami la kumbetawo ndjela untu ukina, ne dia vo kumbeya diui diandi. Khumadiondjo Jesu eli Ulami w'ololo la Ndiambutufanya la ekoko. Untu tshe eko ushinga wulu l'ashu wa Unyashungu. Ndi halangi nshisha nduku otoi asu.

Ufanya wela one la ushimu wa usi ngelu lakashisha mbudi kana koko la akakiyangi edja ndu ndi akakitani ntu.

Embula wa mbambula

- Lu wela one, ekoko engana wakashisho?
- Engana wakatshikala kame l'usui?
- Lukumbu la Ulami asu w'ololo na?

2. **Uwashihudia kitshimudi ya wela.** Enda vesa 7.

Umbula: Nshisho uma le Unyashungu eli na?

Utunyi a Unyashungu, Satana, akafutanya yimba ya antu dia vo tawulimbitelaki Unyashungu uku endi, la dia vo tawutanaki mbuka ka nkuma lakandi. Uma lu dikambu ne mbakatumi Unyashungu On'andi, Jesu, la kete la ndjuyanga la ndjushimbela antu wushishwi. Nduku untu ukina leya ntushihudia uku weli Unyashungu a mete, paka Kristu Jesu, On'a Unyashungu. Nduku ukina leya ntushimbela, paka Kristu Jesu, On'a Unyashungu. Nduku mbuka kekina ka nkuma le Unyashungu, paka Kristu Jesu, On'a Unyashungu Ndame.

Uteli ana dia ngandji ka wuki kakatuki Khumadiondjo Jesu, ndu dia asui wakandatusuwela lu ndjutuyanga la ndjutushimbela.

3. **Naka we ambushisho** ku untu ambukutana l'ukunda, na dikambu diayutsha na? Vo wakuteli tukanyi tawo. Ee mete, we ayuyela, kana ayuyakimo l'any'andi dia ndi nkemba la ngelu.

We ambuka diui dia Jesu elo, One lakayi lane la kete uma laka Unyashungu a mete l'ulungu dia ndjukuyanga, we lushishwi. Kuku, ayuyutsha na?

(a) Kadimula utema. Uwashihudia diui ne.

(b) Uyakimo tshe le Jesu dia Ndi nkushimbela la memba lumu laye tshe pulu ndu l'ulungu.

4. **Tokenyo:** Ona omotshi mbeyaka ndjafanya la mbudi kawana l'andja luudu, ku ukina ayuweta lukumbu la ayûyanga edja ndu ambûtana.

Diui dia mbuho diambumasonola lu desona ne nkukaka alesona akina asatu wa Luka tshapita 15. Lam'ayushila alesona ako anei, nfanaka aui ako wa mbuho wayukikitala wulu l'etema wa ana wambaeka.

Lu nkumia aui ane, dimi lalanga dia nyu mbala aui wakafundi Mose lu Euhwelu k'Elembe 6:6 la 7. Nyuwaumbi l'etem'anyu.

Par Mama Ketshi (Beryl Harris)